

# JUD

## lokv Siti Jinam

### Mintamchonam

*Jud gv sitiv tamsar sarmurnv vdwa oogv mvngjwngnv gobv minsu dunv vdwa himasula ka vla gamrwpvla rito. Soogv siti lvknam achok so, oogv lvknv ngv 2 Pitar lo lvknam jvbv ninyigv purinv vdwa “Pwknvyarnv ninyigv nyi vdwa lvkin lo dvbvdwki gv lvgabv jilwkunam mvngjwng lvgabv nyimak ka damirimi silaka” vla mintvmirula lvkto.*

#### **Arwng lokv darlinnam**

Mintamchonam (1-2)

Gwngnamrinam, tamsarnam, okv tamsar sarmur gnv vdwg v sijingoojiku (3-16)

Mvngjwng nga doobvdakbv dubv minsarnam (17-23)

Minyungminya kunam (24-25)

<sup>1</sup> Jisu Kristo gv pakbu, okv Jems gv achiboru, Jud lokv—

Pwknvyarnv gv goknam, oogv Pwknvyarnv Abu gv paknam lo doonv vdwa okv Jisu Kristo gv ringrya kunam vdwa lvkdu:

<sup>2</sup> Ayanam, sarsopoyonam okv Pakmi sinamv nonu gvlo akomaring bv sapla kuma dubv doolwk yilaka.

*Tamsar sarmurnv vdww*

<sup>3</sup> Ngoogv ajin vdww, ngonu paabam kunam ringlinbaalin nam lvkwng lo ngo nonua alvbv

lvkjinvpv mvngla lvgvlvmabv ridung la rito, vdwlo ngo lvkdubv mvngkunam vv Pwknvyarnv gv nyi vdwa lvkin lo dvbvdwki gv lvgabv mvngjwng sinam am jilwk kunam gv lvgabv dami sidubv mintvmiru la lvkrung dubv rito. <sup>4</sup> Holvgavbolo ngonugv pingkolo chimpa madubv Pwknvyarnvnyi chimanv nyi go aato, oogv nyi vdww ngonugv Pwknvyarnv gv anyuaya doin am bunu milomiyikla bunugv gwngmur singmur vdwa mintum mimum sidubv rito, okv vv bunu ngonugv Ahtu akin, Jisu Kristonyi tu anv. Bunugv vbv miyakaya nama paasv nga darwknv kitap lo klokvocho lokv mincho jitoku.

<sup>5</sup> Holvgabv nonu soogv mvnwng sum chinla doosu jvka, Ahtu\* gv oguaingbv Israel gv nyi vdwa Ijpt mooku lokv laalin kubvdw, vbvritola kokwng so yvvdw mvngjwng madunv um mvyakriyak la rikubvdw um nonua ngo chimu so mvngla mimpa dukunv. <sup>6</sup> Nyidogindung vdww yvvdw bunu atubogv rigvdogv dubv tujupkunam riji jeku lo gomwng mabv, vbvritola awgv dookulo doomabv kayu pikula rinv um mvngpa tvlaka: bunu vdwa kanvparamku lvkwng lo dvbvsingtam bv doobwngnv jaako lokv leetola apvdu, Pwknvyarnv gv kairungnv Alu gv lvgabv apvtvla ho alunyi bunua miyakaya riku. <sup>7</sup> Sodom okv Gomorrah okv agumaigv banggu gv nyi vdwa oogv Nyidogindung vdwwv vbv rinamdaknam aingbv ribvdw um mvngpa tvka okv oogv nyi vdww nyimvnyilo rimisila gwngmur singmur la okv rinamrisu bv ri-

---

**1:5** Mog 12:51; Num 14:29,30  
Greek lo minam akin bv Josua.

\* **1:5** Ahtu; Kitap kvvgo nvlo Jisu,  
**1:7** Atk 19:1-24

nam lokv: vbvrikunamv bunugv vdwloka nyeka manv vmv bv gubvku lo mvrtrit la mvnwnv nga gamrw jinam lvgabv mvtoku um mvngpa tvka.

<sup>8</sup> Ho gv apiabv soogv nyi vdws, oogv bunu atubogv aw am rimur sinam lo rilwk sidubv nyikrw kaala doodu; Bunu Pwknvyarnv gv tujup-kunam am laarwk simadu okv ao tologv yunglitnv vdwa nyarjitari yingla ridu. <sup>9</sup> Dumpoyachok bv rigvnyidogindung Maikel ka svbvching rimato. Vdwlo Moses gv awa yvv gvvriddw vla ragoraapin minsula vbv Maikel Uyudvbv nga larmi sikubvdw; Maikel Uyudvbv am miyakaya la minjap-minrap gaamgo minyu mato, vbvritola minto, “Ahtu nam yamla yampak gvika!” <sup>10</sup> Vbvritola Soogv nyi vdws bunu oguguka tvchinkaapak matola nyi am minda kla bv minying minchola mindu; okv bunu mootum gv svnwnvsvmin aingbv oguguka mvngchin kaachin nvnv kaamadu, ringonam lokv bunu vbvridunv, vbvri-nam lokv bunua sigvngogv jinv ngv. <sup>11</sup> Bunu lvgabv vdwgo busunamgo bv riredw! Bunu Kein gv ribv riming gvvdw. Holvgabv bunu Balaam gv rilwkdolwk nambv bunu morko gv pwnam paanam lokv jitola awa rimur lo riduku. Bunu Kora gv yalung rinam aingbv yalung gobv rito, okv ninyia mvyakriyak kunam aingbv bunu vdwa mvyakriyak toku. <sup>12</sup> Bunugv dvbamtvngham kolo hinyingyiru kaamabv dvkium tvngkium la rinam si nonu kasingkanyak go doolwk kunam aingbv ridu. Bunu atubonga mvngchik hing-

---

**1:9** Dan 10:13,21; 12:1; Nyikrw 12:7; Det 34:6; Jek 3:2     **1:11** Atk 4:3-8; Num 22:1-35; Num 16:1-35

gukaagu simwngdu. Bunu doomwk ka doori gv rila riya nam aingbv ridu, vbvritola nyido laalwk madu. Bunu apwasi svvmanv singnv aingbv ridu, dvrwdvrapinko lojvka, singnv miami am buulin tvkula okv sinsuk kunv aingbv ridu. <sup>13</sup> Bunu sv-masa gv mvtor nyomanam sibu tvvlin nam aingbv ridu, bunugv hinyingyiru kaamabv kudungkua rinamv isi gv sipiktait kaapanv aingbv kaatamdu. Bunu takar ngakarnv jvbv ridu, ogulvgavbolo Pwknvyarnv bunugv dooku go kanvtungkia lo hvbvjinamv.

<sup>14</sup> Kvvlo lokv bunua soogv lvkwnglo Adam lokv lalayikula singtam kanwnvnnv<sup>†</sup> lo gobv Enok soogv gaam so mincho jitoku: “Ahtu ninyigv darwknv nyidogindung achialv hejarhejar vdwgv lvkobv aagv la aare <sup>15</sup> mvnwnng nga jwngkadaka la, bunugv Pwknvyarnv chimabv darwkmanv kudungkua rimurnv vdwa okv Pwknvyarnv chimabv busunam gaam am ninyigv lvkwnglo japla rimurnv vdwa miyakaya reku.”

<sup>16</sup> Soogv nyi vdwsu grunggrang bv minbvla okv kvvbiya gungnying lwkila ridu; Bunu vdwv bunugv atubogv alvmabv mvngnam lo rinwng nyadu; bunu atubogv lvkwnglo bunu kai mvng-sudu okv bunugv atubogv mvngnam mvnwnng nga ridubv vla kvvbiya japriukla ridu.

### *Gamrwnam okv minsarnam*

<sup>17</sup> Vbvritola ngoogv ajin vdw, ngonugv Ahtu Jisu Kristo gv Apostol vdwgv lokv vngyikunv lo

---

**1:14** Atk 5:18,21-24 † **1:14** kanwnvnnv: Soogv numbar atukchuchok okv ataranya anyibabwng nga miyominchikla singtam kanw amin kiilula Adam lokv lala yila Enok gobv kitardunv.

ogugo minji kubvdw um mvngpa tvlaka. <sup>18</sup> Bunu vdww nonua vbv minjito, “Vdwlo lotarlonya alu ngv aaredw, nonua nyarjitarinv nyi vdww mire, nyi ngv Pwknvyarnv chimabv bunu atubogv mvngnambv rinw vdww.” <sup>19</sup> Soogv nyi vdww miyakmvpak dubv rigvnnv, oogv darwknv Dow kaama bv atubogv adwnamar lokv mvngdung am rigvdogv kunv. <sup>20</sup> Vbvrította ngoogv ajin vdwa, nonugv darwknv mvngjwngnam lokv nonu atubogv vngdwng rungbv svyinsvrup sulaka. Darwknv Dow gv jwkrw lokv kumto laka, <sup>21</sup> okv ngonugv Ahtu Jisu Kristo gv aya lokv turbwngnv singdung am jiku dubv kaayala dookulo Pwknvyarnv gv paknam lo doobvdakbv laka.

<sup>22</sup> Yvvbunudw mvngum dunv ho vdwa aya nga kaatam tvlaka; <sup>23</sup> Kvgonv bunu vdwa mvv lokv svli lala linla ringto laka; okv kvgonyi aya mvngpa la okv busu yingla ritolaka, vbvrította bunugv rimur lokv rigvnnv bunugv vjivbe umka kasingkanyak tvlaka.

### *Hartvla Kumnam*

<sup>24</sup> Nonua olu jiku lokv gaktungla, okv rigakpama nvgobv okv mvngpu am ninyigv yunglitku kaagia lo laalwk lanv ninyia— <sup>25</sup> Ngonua ringnvbaanv Pwknvyarnv mvngchik lo, ngonugv Ahtu Jisu Kristo gv lokv, yunglitnv, kairungnv, gwlvknv, okv tujupkunamv, klukrium lokv, okv vjakka, dvbvsingtam gv okv dvbvdwki lo gobv doobv minggv yilaka! Amen.

**ANWNV GAMLV**  
**Tagin first Bible translation based on TEV (Good News)**  
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin  
Published as

**ANWNV GAMLV**

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

---

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed